



**Äntwert vum Minister fir Famill, Solidaritéit, Zesummeliewen an Accueil, Max Hahn op d'parlamentaresch Fro n°2262 vum honorabelen Deputéierte Sven Clement iwwer d'Situatioun vun der Obdachlosegkeet am Quartier Gare zu Lëtzebuerg-Stad.**

Ad 1)

**Wéi eng Moosname plangt de Minister ze huelen, fir déi aktuell Obdachlosesituatioun am Quartier Gare ze verbessern an den Awunner hir Liewensqualitéit ze garantéieren?**

Virop ass et wichteg z'ënnersträichen, dass keen Amalgam dierf gemaach ginn tëscht engersäits Persounen déi op der Strooss liewen an Drogenofhängegkeet an -kriminalitéit anersäits. Net all Mënsch dee sech an enger Situation de sans-abrisme befënnt ass drogenofhängeg, grad ewéi net all Persoun déi drogenofhängeg ass, op der Strooss leeft.

Mam Zil d'Situatioun op der Stater Gare ze verbessern, d'Drogekriminalitéit zu Lëtzebuerg geziilt ze bekämpfen an de betraffene Persounen, déi sech an enger grousser sozialer, psychescher a medezinescher Detresse befannen ze hëllef, ass den 8. Mee 2025 ënner der Koordinatioun vum Inneministère a gemeinsam mam Justizministère, dem Ministère fir Gesondheet a sozial Sécherheet, dem Familljeministère an der Stad Lëtzebuerg, an enker Zesummenaarbecht mat der Police an den zoustännege Justizautoritéiten, den Aktiounsplang *Drogendësch 2.0* virgestallt ginn.

Nieft de Mesurë vum Inneministère, Justizministère an dem Ministère fir Gesondheet a sozial Sécherheet an de Beräicher vun der Repressioun an der Prise en charge vun de Persoune mat enger Drogenofhängegkeet, huet de Familljeministère verschidde Moosname presentéiert, déi sech an d'Kontinuitéit vun der Politik am Beräich vum Kampf géint d'Obdachlosegkeet aschreiwen. Sou sollen d'Hebergements- a Wunnstrukture weider ausgebaut ginn, notamment am Beräich vum ‚Housing First‘, et solle weider ‚Haltes de nuit‘ an zousätzlech Urgencebetter geschaf ginn.

Zousätzlech ass d'Ouverture vun enger ‚Buanderie sociale‘ mat Méiglechkeeten eng Dusch ze huelen a säi Gezei ze wäsche virgesinn, souwéi d'Schafe vun engem Atelier, an deem déi betraffe Persounen enger Beschäftegung kënnen noغو an domat eng strukturéierend a valoriséierend Offer am Alldag ugebuede kréien.

Déi genannte Mesurë stellen eng Selektioun vun de geplangten Aktiounen am Kampf géint d'Obdachlosegkeet vum Familljeministère duer a réien sech an déi global Approche vum Familljeministère géint Aarmut a sozial Exklusivitéit an.



## Ad 2)

### **Wéi eng Statistike leien dem Ministère iwwer d'Unzuel vun Obdachlose vir, a wéi vill Schlofplaze sinn aktuell an den Noutënnerkénft disponibel?**

Säit 2022 gëtt am Opdrag vum Familljeministère zweemol d'Joer, eemol am Summer an eemol am Wanter, e Recensement vun den obdachlose Persounen um Territoire vun der Stad Lëtzebuerg, an säit 2024 och um Terrain vun der Stad Esch-Uelzecht, duerchgefouert.

D'Donnéeën zur Situatioun vun der Obdachlosegkeet ginn aus dem Rapport zur véierter Editioun vum Recensement aus dem Juni 2024 ervir, publizéiert op der Internetsäit vum Familljeministère<sup>1</sup>. Sou goufen insgesamt 238 Persounen als obdachlos rezenséiert.

De Familljeministère finanziert aktuell siwen nidderschwelleg Strukture fir obdachlos Persounen. Dobäi kommen d'Strukturen, déi vun anere Ministère a lokalen Autoritéite gedroe ginn.

- Um Territoire vun der Stad Lëtzebuerg befannen sech aktuell véier ‚Haltes de nuit‘, mat enger Gesamtkapazitéit vu 47 Better. Dobäi kommen sougenannten ‚Foyers d'urgence‘, mat enger Gesamtkapazitéit vu 74 Better: de Centre Ulysse mat aktuell 36 Better, d'Annexe vum Centre Ulysse zu Méchela mat 16 Better an den Abrisud zu Esch-Uelzecht mat 22 Better.
- Dës permanent Offere ginn all Joer tëschent Mëtt November a Mëtt Abrëll duerch d'Wanteraktioun um Territoire vun der Gemeng Sandweiler, mat enger Kapazitéit vun 250 Better, déi am Noutfall op 300 erhéijt kënne ginn, ergänzt.
- Erweidert ginn dës Offeren duerch 14 konventionéiert Servicer déi Persounen an enger Wunnengsnout iwwert laang Zäit logéieren a betreiën.

## Ad 3)

### **Firwat ginn déi existéierend Hëllefsoffere scheinbar net ugeholl vun deene betraffene Persounen an huet de Ministère eng Strategie fir dës Hëllef besser zougänglech ze maachen?**

Wéi an der Äntwert op d'Fro 1) ervirgehuewen, ass et wichteg keen Amalgam ze maachen tëscht Obdachlosegkeet an Drogenofhängegkeet. Déi vum Familljeministère konventionéiert Hëllefstrukturen am Beräich vun der Obdachlosegkeet verzechnen zanter Joren en héijen Occupationstaux.

---

<sup>1</sup> <https://mfsva.gouvernement.lu/dam-assets/publications/rapport-etude-analyse/etat-des-lieux-sans-abrisme/20251001-rapportfinal.pdf>



Aus deem Grond schafft de Ministère kontinuéierlech mat senge Partner dorun, déi ënnerschittlech Hëllefsofferen auszebauen an un déi ënnerschiddlech a komplex Liewenssituatioune vun de betraffene Persounen unzepassen. D'Zil ass et, d'Offer esou ze gestalten, datt si vun de Betraffene fräiwëlleg ugeholl kënnen ginn, a gläichzäiteg hir Autonomie respektéiert a gestärkt gëtt.

#### Ad 4)

**Wat fir multidisziplinär Approche plangt de Minister mat anere Ministère (z.B. Inneministère, Gesondheitsministère) fir net nëmmen d'Symptomer, mee och d'Ursaache vun der Obdachlosegkeet ze bekämpfen?**

Nieft dem ministeriellen a kommunalem Aktiounsplang *Drogendësch 2.0*, wäert de Familljeministère, wéi am Koalitiounsaccord virgesinn, a Kollaboratioun mam Secteur, betraffene Persounen, concernéierte Ministère a Gemengen en neien nationalen Aktiounsplang géint d'Bekämpfung vun der Obdachlosegkeet ausschaffen.

#### Ad 5)

**Wéi eng konkret laangfristeg Projete ginn et, fir Persounen déi reegelméisseg am Quartier Gare iwwernuechten eng stabil Wunnsituatioun unzebidde?**

De Familljeministère finanzéiert nieft de kuerzfristegen Noutënnerkënfte och mëttel- a laangfristeg Betreuungs- a Wunnmodeller, déi ënnert anerem iwwer d',Gestion Locative Sociale', den abordabele Wunnraum an aner Initiative mobiliséiert ginn. Am Joer 2024 huet de Ministère 14 Servicer konventionéiert, déi zesumme 5.715 Persounen an enger Situatioun vu Wunnengsnout begleet hunn, dëst an 1.560 Wunnunitéiten. Als Beispiller kënnen genannt ginn d'Wunnstruktur fir eeler fréier obdachlos Persoune vun der Claire asbl, encadréiert a begleet Wunnstrukturen, déi ënner anerem vun Hëllef um Terrain an dem Comité National de Défense Sociale geréiert ginn oder nach d',Maison Michels' vun der Stad Esch-Uelzecht. De Betreuungsmodell vum 'Housing First' stellt eng vun de bewäerten Approchen duer, déi sech u Persoune richt, déi iwwer laang Zäit ouni festen Ënnerdaach gelieft hunn an zu Lëtzebuerg hir sozial Rechter hunn. Insgesamt sinn 62 Persoune mat dëser Approche am Joer 2024 accompagnéiert ginn. Dobäi kommen nach déi an der Äntwert op d'Fro 1) ernimmte Projeten.

D'Zil vun all Accompagnement ass et, all eenzel Persoun op hirem Wee an d'Autonomie z'ënnerstëtzen, hir eng sozial Stabilitéit ze bidden a se laangfristeg an engem stabillen Doheem z'intégréieren.



LE GOUVERNEMENT  
DU GRAND-DUCHÉ DE LUXEMBOURG  
Ministère de la Famille, des Solidarités,  
du Vivre ensemble et de l'Accueil

Wichtig ass et ze betounen, datt dës Offere fir all concernéiert an eligibel Persoun zougänglech sinn, onofhängeg dovun, ob se sech regelméisseg am Quartier Gare ophalen.

Lëtzebuerg, den 10. Juni 2025

Minister fir Famill, Solidaritéit,  
Zesummeliewen an Accueil

(s.) Max Hahn